



Xalq so'zi

O'zbekiston —
kelajagi
buyuk
davlat

2023-YIL — INSONGA E'TIBOR VA SIFATLI TA'LIM YILI

1991-yil 1-yanvardan chiqa boshlagan • WWW.XS.UZ • E-mail: Info@xs.uz • 2023-yil 22-dekabr, № 273 (8616)

Juma Saytimizga o'tish uchun QR-kodni telefoningiz orqali skaner qiling.



KO'P QIRRALI HAMKORLIKNI KENGAYTIRISH MUHIMLIGI QAYD ETILDI

O'zbekiston Respublikasi Prezidenti Shavkat Mirziyoyev 21-dekabr kuni tashrif bilan mamlakatimizda bo'lib turgan Qirg'iz Respublikasi tashqi ishlar vaziri Jeenbek Kulubayevni qabul qildi.



O'zbekiston bilan Qirg'iziston o'rtasidagi do'stlik, yaxshi qo'shnichilik va keng ko'lami strategik sheriklik munosabatlarini yanada mustahkamlash, ularni aniq mazmun bilan boyitish masalalari ko'rib chiqildi.

Uchrashuv avvalida tashqi ishlar vaziri Jeenbek Kulubayev davlatimiz rahbariga Qirg'iz Respublikasi Prezidenti Sadir Japarovning salomi va eng ezgu tilaklarini yetkazdi.

O'zbekiston yetakchisi keyingi yillarda ikki tomonlama hamkorlik yuksak darajaga chiqqani va sarmahsul tus olganini, shu jumladan, parlamentlar, hukumatlar, hududlar, jamoatchilik va ishbiarmon doiralar darajasidagi muloqot va almashinuvlar ancha faollashganini katta mamnuniyat bilan qayd etdi.

Hukumatlararo komissiya samarali faoliyat yuritmoqda. O'zbekiston — Qirg'iziston taraqqiyot fondi ishga tushirildi. Tovar ayirboshlash va yuk tashish hajmlari ortmoqda, mashinasozlik, elektrotexnika, to'qimachilik, qishloq xo'jaligi va boshqa tarmoqlarda kooperatsiya loyihalari amalga oshirilmoqda. Qo'shma madaniy-gumanitar tadbirlar muntazam ravishda o'tkazib kelinmoqda.

Faol siyosiy muloqotni davom ettirish hamda ustuvor dastur va loyihalarni, shu jumladan, Xitoy — Qirg'iziston — O'zbekiston temir yo'li qurilishini jadallashirish muhimligi alohida ta'kidlandi.

O'ZA.

O'zbekiston Respublikasi Prezidenti Matbuot xizmati surati.

O'ZBEKISTON PREZIDENTI MISR YETAKCHISINI SAYLOVDAGI ISHONCHLI G'ALABASI BILAN TABRIKLADI

O'zbekiston Respublikasi Prezidenti Shavkat Mirziyoyev 21-dekabr kuni Misr Arab Respublikasi Prezidenti Abdulfattoh as-Sisi bilan telefon orqali muloqotda uni Prezident saylovida qozongan ishonchli g'alabasi bilan samimiy qutladi.

Saylovchilarning faol ishtiroki va ovoz berish natijalari do'st Misr xalqi amaldagi davlat rahbarining siyosati va islohotlar dasturini keng qo'llab-quvvatlayotganidan dalolat ekani qayd etildi.

O'zbekiston — Misr keng ko'lami sheriklik munosabatlarini yanada mustahkamlash va ko'p qirrali hamkorlikni kengaytirish masalalari ko'rib chiqildi.

Joriy yil fevral oyida Qohiraga oliy darajali tashrif davomida erishilgan kelishuvlarni amalga oshirishga alohida e'tibor qaratildi.

Muloqot va almashinuvlar faol davom etayotgani mamnuniyat bilan qayd etildi. O'zaro savdo hajmi oshib bormoqda. Qishloq xo'jaligi, geologiya, suv ta'minoti, transport, logistika, kimyo sanoati va boshqa ustuvor sohalarda kooperatsiya loyihalari boshlandi.

Ikki tomonlama Hukumatlararo komissiya va ishbiarmonlar kengashining navbatdagi yig'ilishlarini o'tkazish kelishib olindi.

Xalqaro kun tartibidagi dolzarb masalalar yuzasidan ham fikr almashildi.

O'ZA.

SENATORLAR TOMONIDAN BIR QATOR TAKLIFLAR ILGARI SURILDI

Kuni kecha bo'lib o'tgan Oliy Majlis Senatining qirq sakkizinchi yalpi majlisidan o'rin olgan har bir masalaga senatorlar mas'uliyat hissi bilan yondashdi. Negaki, mazkur masalalar mamlakatimizda olib borilayotgan izchil islohotlar jarayoniga yangicha sur'at berishga yo'naltirilgan bilan alohida e'tiborga molik. Senatorlar ulardan ayrimlarining mazmun-mohiyati hamda ahamiyati xususida shunday fikr bildirdi.

Fikr

Daraxt kesganlik uchun javobgarlik kuchaytirilmoqda

Boriy ALIXONOV, Oliy Majlis Senatining Orolbo'yi mintaqasini rivojlantirish masalalari va ekologiya qo'mitasi raisi:

— Keskin iqlim o'zgarishlari kuzatilayotgan hozirgi paytda tabiatni asrab-avaylash hamda yashil hududlarni kengaytirish har qachongidan muhim ahamiyat kasb etmoqda. Shundan kelib chiqib, keyingi yillarda yurtimizda bu masalaga katta e'tibor qaratilmoqda. Aniq aytganda, aholi punktlarini ko'kalamzorlashtirish, daraxtlar va butalarni muhofaza qilish, shuningdek, yashil zonalarni kengaytirish bo'yicha keng ko'lami ishlar olib borilayotir.

Yalpi majlisda senatorlar tomonidan ma'qullangan "O'zbekiston Respublikasining ayrim qonun hujjatlariga o'zgartirish va qo'shimchalar kiritish to'g'risida"gi qonun ana shu maqsadga yo'naltirilganligi bilan alohida ahamiyatga ega. Gap shundaki, ko'rilayotgan chora-tadbirlarga qaramasdan hamon ayrim shaxslarning o'simlik dunyosi obyektlariga nisbatan tajovuzkorona xatti-harakatlari, jumladan, daraxtlarning qonunga xilof ravishda kesilishi bilan bog'liq holatlar kuzatilyapti.



DAVLAT BUDJETI TAQSIMOTIDA QANDAY O'ZGARISHLAR BOR?

Oliy Majlis Senatining Budget va iqtisodiy islohotlar masalalari qo'mitasi tomonidan Hududiy vakillik organlari faoliyatini o'rganish markazi bilan hamkorlikda mahalliy Kengashlarning mahalliy budjet, iqtisodiy islohotlarni amalga oshirish, investitsiya va tadbirkorlikni rivojlantirish masalalari bo'yicha doimiy komissiyalari uchun seminar o'tkazildi. Mazkur tadbir "2024-yil uchun O'zbekiston Respublikasining Davlat budjeti to'g'risida"gi qonunning mazmun-mohiyatini tushuntirishga bag'ishlandi.

Seminar

Qayd etilganidek, Davlat budjetining 2024-yil uchun parametrlari, budjet taqchilligi miqdorlari jahon iqtisodiyotidagi noaniqliklar va geosiyosiy vaziyatning mamlakatimiz iqtisodiyotiga ta'sirini yumshatish va ijtimoiy himoyaga muhtoj aholini davlat tomonidan qo'llab-quvvatlashni yanada kuchaytirish singari

omillarni e'tiborga olgan holda hisob-kitob qilingan. O'zbekiston Respublikasi konsolidatsiyalashgan budjetining 2024-yilgi daromadlari 375 trilyon so'm va xarajatlari 427,6 trilyon so'm, taqchilligi 52,6 trilyon so'm yoki YIMga nisbatan 4 foiz miqdorida belgilanmoqda.



Saylov va referendum o'tkazish: DEMOKRATIK QOIDALAR VA YANGICHA YONDASHUV

Shu yil 18-dekabr kuni Prezident Shavkat Mirziyoyev tomonidan "O'zbekiston Respublikasining ayrim qonun hujjatlariga saylov va referendum o'tkazish tartibini yanada takomillashtirishga qaratilgan o'zgartirish va qo'shimchalar kiritish to'g'risida"gi O'zbekiston Respublikasining Konstitutsiyaviy Qonuni imzolandi.

Qayd etish joiz, mazkur hujjat bilan O'zbekiston Respublikasining ayrim qonun hujjatlariga Oliy Majlis Qonunchilik palatasi deputatlari saylovini aralash saylov tizimi (majoritar va proporsional) asosida o'tkazishni, shuningdek, saylov organlarining markazlashgan tizimini

shakllantirish, saylov komissiyalari tizimini maqbullashtirish, Markaziy saylov komissiyasi faoliyatini takomillashtirish hamda siyosiy partiyalar tomonidan deputatlikka nomzodlar ko'rsatilayotganda ayollar sonining eng kam miqdorini nomzodlar umumiy sonining o'ttiz foizidan qirg' foizga oshirishni nazarda tutuvchi o'zgartirish va qo'shimchalar kiritildi.

Muxbirimiz ushbu Konstitutsiyaviy Qonunning ahamiyati, mazmun-mohiyati haqida Oliy Majlis Qonunchilik palatasining Korruptsiyaga qarshi kurashish va sud-huquq masalalari qo'mitasi raisi Jahongir SHIRINOV bilan suhbatlashdi.

Eksklyuziv intervyu

— Jahongir Jabborovich, aytinch, mamlakatimizda saylov qonunchiligini takomillashtirishga qanday zarurat bor edi?

— Bilamizki, saylovlar orqali har bir fuqaro jamiyat va davlat ishlarini boshqarishda bevosita qatnashadi hamda ushbu siyosiy jarayonda mamlakat taqdiriga befarq emasliklarini

namoyon qilgan holda faol ishtirok etadi. Shu nuqtayni nazardan aytganda, fuqarolarning mamlakat boshqaruvida yanada keng qatnashuvini ta'minlash maqsadida mamlakatimizda saylov qonunchiligini izchil takomillashtirib borishga alohida e'tibor qaratildi. Binobarin, yangi tahrirdagi Konstitutsiyamizda ham saylov tizimini takomillashtirishga qaratilgan qator

normalar o'z aksini topdi. Ayniqsa, saylovlarni professional, ochiq va demokratik tarzda uyushtirish va o'tkazish uchun Markaziy saylov komissiyasining konstitutsiyaviy maqomi yanada mustahkamlandi. Xususan, saylov organlarining vertikal tizimini yaratish maqsadida Markaziy saylov komissiyasi zimmasiga nafaqat Prezident saylovi yoki parlamentga saylovni, balki xalq deputatlari Kengashlariga saylovlarni ham tashkil etish va o'tkazish vazifasi yuklatildi.



MA'NAVIYAT CHIROG'I

INSONNING ONGU TAFAKKURINI YORITADI, QALBI, VIJDONINI UYG'OTADI

Taraqqiyot, tinchlik-totuvlik barqarorligi, qo'yingiki, har qanday ezgu maqsad inson omili vositasida ro'yobga chiqadi. Soddaroq aytganda, kishi salohiyatli, ertani o'ylaydigan, qalbi pok, milliy g'ururi baland, vijdoni uyg'oq, halol bo'lsa, o'z oldiga ezgu maqsadlar qo'yadi va ularga astoydil intilib yashaydi. Boshqalarga qayishadi, o'zidan yaxshi iz qoldirish uchun harakat qiladi. Turli nopok yo'llardan yurmaydi, nomiga dog' tushirmaydi.

Prezidentimiz yangi O'zbekistonni bunyod etishni, uchinchi Renessans poydevorini yaratishni maqsad qilib qo'yarkan, faoliyatining dastlabki yillaridanoq iqtisodiy taraqqiyotni ta'minlashga qaratilgan keng ko'lami chora-tadbirlar bilan birga, yangi davr kishisini tarbiyalash, odamlar ongu tafakkurini o'zgartirish, hayotga qarashlarini isloh etish, milliy g'ururni yuksaltirishni eng dolzarb masalalardan biri sifatida urg'uladi. Bu yo'lda qiyosi yo'q inqilobiy o'zgarishlar amalga oshirilib, qator qonun, Farmon va qarorlar imzolandi, ko'plab yig'ilish va uchrashuvlar o'tkazildi. Ularda ma'naviy-ma'rifiy islohotlarning ustuvor yo'nalishlari belgilab berildi.

Dolzarb mavzu



Milliy o'zlik tomon dadil qadam

Ilgari ma'naviy-ma'rifiy soha haqida ko'p gapirilsada, uni rivojlantirishga kompleks yondashilmagani, mavjud muammolar ilmiy tahlillar asosida bartaraf qilinmagani, yetarli mablag' ajratilmagani ochiq tan olinib, islohotlarning yangi davrida bu masalalarni to'la hal etishga kirishildi.

Prezidentimiz qarori bilan ma'naviy-ma'rifiy targ'ibot ishlarining mazmun-mundariyasini

tubdan yaxshilash, ularning ko'lami va miqyosini kengaytirish, tizimda faoliyat ko'rsatayotgan soha xodimlarining bilim va malakasini izchil oshirib borish, tuman (shahar) darajasidagi xodimlar mehnatiga haq to'lashning barqaror tizimini yo'lga qo'yish, sohada faoliyat yuritayotgan muassasa va tashkilotlar ishini muvofiqlashtirish hamda ularning samarasini oshirish maqsadida Respublika Ma'naviyat va ma'rifat markazi tashkil etildi.



Хасан ПИЙДОВ ёнраи суратроп.

